

Mepepelime ma Bulu a tyo ya Aza a Afisu

Ucuduwu wa aatagada a nda

Bulu dana ta mepepelime ma nda a tyo a aza e Itoni a na a ri atsuma a Afisu a mantsa ma na u dana atsuma o u'wa wa ali. Bulu danu ta atsuma a Afisu a'wan a ta'atsu o ritosu ama adama e Yesu Zamawawa. Ayi amali Atima u dana ta na abajini a aa'isa atsuma a lyuci'i. Aza o ulinga a yuwan ta abajini e eden adama a na a dana ta a winasa amali. Alajiya a Bulu a zuwa ta ama a lyawa atsulu a amali'i. Adama o ndolo a da atsuma a langai aza o ulinga'a lon a aci a Bulu.

Ana a tarai mantsa wa'a dafa Bulu danai aatagada a nda. Atsuma a aatagada a nda u damma ta aza e Itoni atsuma a Afisu ili ya asalama ya abunda a na a tsurai adama a na a ri obolo na Zamawawa. Ili yu uvadi i nda i da shi, amma ili ya zuwa i da i na i la'ai ili yu uvadi. U damma le ta a na aza e Itoni suru ili i ta i da atsuma e Itoni ya Yesu Zamawawa, babu adama e elentsu koko'o. Waru u rito ta ali na amaci cine aa yuwan nden atsuma e Itoni. Waru u rito ta muwun cine a yuwan tsutoni na mbara n le, waru fo u rito ta azagbain aza a na a ri na agbashi, waru u rito ta agbashi.

Ili i na Bulu dammai aza e Itoni atsuma a Afisu ne da fo u ri ubata aza e Itoni ana'an. Tsu ta ni ili i sa'ani de zuwa adama a na tsu ri na Yesu Zamawawa. Ne da fo, u ri ulobonu tsu yuwain wuma cine aatagada a nda o ritoi tsu yuwain wuma.

Ili i na iri pe atsuma a aatagada a nda

1. Icasu (1:1-2)
2. Zamawawa tawaa ta na aba'un a akiza (1:3–3:21)
3. Wuma u sa'avu obolo na Zamawawa (4:1–6:20)
4. Icasu yu ukosu (6:21-24)

Icasu diga ya Bulu

¹ Amu Bulu, amu da maa danasa mepepeline ma nda. Amu aajiya e Yesu Kristi Zamawawa da, adama a na Asula a dangwa mu ta mo o'wo ne.

N ta danasaa ama a akiza a na a ri pe atsuma a Afsu, aza a na aa yuwusan itoni ya Yesu Zamawawa na amayun.

² Lyawa Asula za na ayi da Dada tsu obolo na Zagbain Yesu Zamawawa u roco du isa'ani waru u ca du asuvu nden.

Aba'un adama e Yesu Zamawawa

³ Tsu yuwaan ta Asula na Dada vu Zagbain Yesu Zamawawa ica. Ayi da u zuwaa ntsu aba'un ana u ca ntsu ili i sa'ani suru za na utai diga zuva tsara u kamba wuma u tsu atsuma a ruhu. U yuwan ta ne ana u bolo ntsu na Yesu Zamawawa. ⁴ Ko kafu Asula a yuwan uvadi, u dangwa tsu ta tso o'woi ama a yi a na u bolo ntsu na Yesu Zamawawa. U yuwan ta ne adama tso o'woi na akiza a makakan ma yi, waru babu ili yi idaba i na yaa dana a makakan ma yi a na waa tawaa tsu na addama. ⁵ Adama a na Asula a te icigi i tsu, u yuwan ta ne, adama u kambato tsu muwun ma yi o ure wi ili i na Yesu Zamawawa yuwain. Asula a yuwan ta ne nu ujimu, adama a na ili'i i zuwa yi ta wu uwwa

uyo'o, waru u ciga t̄a u yuwan ne. ⁶ Adama o ndolo tsu cuwa yi t̄a adama a ābajini e ili i isa'ani i na u yuwaan ntsu. U ca tsu t̄a isa'ani i ndolo pere, ātsuma a Zamawawa, za na u cigai. ⁷ Ātsuma e Yesu Zamawawa tso o'wo t̄a fāan adama a mpasa mu ukwā mā yi, āyi d̄a ili i na i zuwai tsu tsuraj̄i gafura vu nusu tsu. O ure u nda u d̄a Āsula o roco ntsu ābajini e isa'ani yā yi ābunda lon. ⁸ Adama a na Āsula a t̄a nu ugbozu, waru u reve t̄a ili suru suru, ⁹ u yuwan t̄a ili i na u cigai u yuwan. U roco tsu t̄a ili i na i dan̄ai usokowu i na u fofoi u yuwan e ekere e Yesu Zamawawa. ¹⁰ Nā mantsa'a ma yuwan a na woo shiton ifofoi yā yi, reve u 6olo ili suru i na i ri zuva nu uvadi nā mogono mā t̄a, āyi d̄a Zamawawa.

¹¹ Āsula a dangwa tsu t̄a tso o'wo ama ā yi ana u 6olo ntsu nā Yesu Zamawawa. U yuwan t̄a ne adama a na u jiyān t̄a nu ujimu u yuwan ne, reve u zuwa ili'i i fara cine u cigai. ¹² U yuwan t̄a ne tsarā ātsu, aza a na ā ri āza o ufaru ātsuma o uzuwu wo okolo e ekere e Yesu Zamawawa, tsu ta zuwa ama a yuwaan Āsula ica adama a na u ri nā tsugbain. ¹³ Waru ne d̄a u ri nā ādu amayun. Yu uwwa t̄a adama a Alabari a Sa'ani za na āyi d̄a ikaka ya amayun, waru a wawa d̄u t̄a. I usu t̄a Yesu Zamawawa reve o 6olo d̄u nā āyi. Adama o ndolo, Āsula a ca d̄u t̄a Ruhū va Akiza za na u yuwayin ama ā yi nzuwulai. Āyi Ruhū'u, u t̄a tsu urotsu za na tsu roco ādu āza ā Āsula a d̄a. ¹⁴ Adama a na tsu ushiyi Ruhū va Akiza tsu uzuwa ne'en, tsu reve t̄a ili i ro yi lo shi, Āsula a ta ca tsu ili i sa'ani i na u yuwain nzuwulai. Waru tsu reve t̄a Āsula a ta zuwa ama ā yi o'wo fāan. Āyi ili i nda u ta zuwa

ama a cuwa Asulā adama a na u ta nā tsugbain lon.

Avasa a Bulu

¹⁵ Adama a na Asulā a zuwaa ntsu aba'un tsundolo, n ta yuwusan avasa a tyo ya'a yi adama a đu. A mantsa ma na mu uwwai a na i ushi ta Yesu Zagbain Zamawawa, waru i ciga ta ama a Asulā, ¹⁶ n to godyusho Asulā adama a đu a mantsa suru. Mantsa ma na n yuwain avasa suru, n tsu yuwaan đu ta avasa. ¹⁷ N ta yuwusan avasa a tyo ya Dada tsu za na ri nā abajini a tsugbain. Ayi da Asulā e Yesu Zagbain Zamawawa tsu. N ta patishi yi wo o'woto đu aza o ugbozu reve waru u roco đu aciyayi, adama i dashi reve yi ulobonu lon.

¹⁸ Waru n ta yuwusan avasa u zuwa đu i đana nu urevu ulobonu lon, adama i reve ili i sa'ani i na u foboi adama a đu. I to purosus i ushi ili i sa'ani i nda adama a na u đe ndu yo o'wo muwun ma yi. Waru n ta yuwusan avasa i reve abajini a aba'un a nzuwulai a na u yuwain a na waa ca ama a yi.

¹⁹ Waru n ta yuwusan avasa i reve ucira wā yi, za na la'ai ili suru, waru za na tsu kamba tsu, atsu aza a na tsu usuyi. Ayi da da abajini o ucira ²⁰ a na u yuwayin ulinga ana u zuwai Yesu Zamawawa kambisa wuma, reve waru u zuwa yi u đanu o ootogu a tsugbain o ukere usa'ani wā yi đe zuwa.†

²¹ Yesu Zamawawa ta yuwusan tsugono a aci a cira suru, aza a na a ri đe zuwa ko na wo o'woi a ta nu ucira lon. Aala a yi a la'a ta akapi a ala a na aa yuwusan tsugono. Gogo ili i nda amayun a đa, waru u to o'wo amayun a mantsa ma na maā ta wā.

²² Asulā a ca ta Yesu Zamawawa tsugono a aci e ili suru suru, reve u zuwa yi aci a aa'isa a aza e Itoni, lipu vā yi. ²³ Ayi aa'isa a aza e Itoni a tsu ushi ta

ucira wā yi e ekere e Yesu Zamawawa, waru ayi ḏa za na tsu ca wuma e ekere e ili suru ubaṭa suru waru.

2

Gogo tsu ta na wuma

¹ Nu ufaru, i rotso ta akwakwa adama a na i 'yuwain a yuwan tsutoni na Asula reve i yuwusan unusu. ² I tsu yuwusan ta nden n du tsa ama o uvadi. I yuwan ta tsutoni na Male, za na ayi da mogono mo otoni a lima za na ri de zuva. Ayi da otoni a lima a na aa yuwusan ulinga atsuma a ama a na a 'yuwain a yuwan tsutoni na Asula. ³ Suru ntsu tsu yuwan ta cine ele fo a yuwusain nu ufaru. Tsu yuwan ta ili yi iwuya i na tsu cigai tsu yuwan biti. Tsu toni ta ili i na okolo a tsu a cigai tsu yuwan suru ni ili i na majiyan ma tsu ma ca ntsu tsu yuwan. Adama a na tsu yuwain iwuya wu ntsaa ta Asula a ca tsu atsumalima, cine waa ca akapi a ama.

⁴ Amma isa'ani ya Asula abajini a da, waru u ciga tsu ta lon. ⁵ U bolo tsu ta na Yesu Zamawawa, reve u ca tsu wuma u sa'avu. U yuwan ta cu'un ndolo ko na u danai a mantsa mo ndolo tsu dana ta tsa akwakwa adama a nusu. Adama e isa'ani i da goon Asula a wawa ndu. ⁶ U 'yasan tsu ta diga o ukwa na Yesu Zamawawa, reve u zuva tsu zuva tsara tsu danu obolo na Yesu Zamawawa, reve waru tsu yuwan tsugono obolo na ayi. Asula a yuwan ta ne ana u bolo ntsu na Yesu Zamawawa. ⁷ U roco tsu ta isa'ani ya yi o ure u nda e ekere e Yesu Zamawawa, tsara a a'wan a na aa tawa ama ee ene abajini e isa'ani a yi waru u la'a ta akapi e ili suru. ⁸ Adama

e isa'ani† i na Asulā o roco ndu da goon u wawa ndu o ure u na i usuyi Yesu Zamawawa. U wawa du adama e ili i sa'ani i na i yuwain shi. ⁹ Ayi nda une'e wā Asulā u da a tyo ya'a du, amma adama e ili i na i yuwain i da shi. Ayi da i zuwai nanza aa 'yasan avangaci shi. ¹⁰ Asulā a da a zuwa ntsu tso o'woi ili i na tsu ri. Atsumā e Yesu Zamawawa, Asulā a yuwan tsu tā tsarā tsu yuwan linga sa'ani. Ure u na u foboi u nda nu ujimu u da adama tsu toni.

Yesu Zamawawa bolo tsu tā ubatā u tā

¹¹ Adu Atakpaci a da i shi. Adu da ama a na aza a Isra'ila a tsu de “aza a na a paɗai uryumbu shi.” Aza a na e de ndu “aza a na a paɗai uryumbu shi”, e de tā aciyele, “aza a na a paɗai uryumbu.” (Mapaɗa mo uryumbu ili i na a tsu yuwan a lipu le da.) ¹² I cuwan a mantsa mo ndolo, koto i shi i reve Yesu Zamawawa shi, i shi pe atsumā a ama e ida ya Isra'ila shi. Asulā a yuwan tā akucunu ne ele, amma na adu shi, reve u yuwaan le nzuwulai mi ili ya abunda agba adama a du a da shi. I shi tā pe atsumā o uvadi u nda agba i shi ni ili i na yaa zuwa okolo shi, waru koto i shi i reve Asulā shi. ¹³ De acapa, i dana tā alanga, amma gogo a na o bolo ndu na Yesu Zamawawa, Asulā a rawato du tā zuzu na aciyayi o ure wu mpasa wā Yesu Zamawawa.

¹⁴ Yesu Zamawawa na aciyayi u tawaā tsu tā na asuvu nden. Nu ufaru tsurala tsa na tsā ri pe e memere ma aza a Isra'ila na Atakpaci u tā gashi uɓaɓu. U tawa tā tsurala tso ndolo, reve u kambato tsu ama e ili i tā. ¹⁵ Wilā wa aza a Isra'ila a tā ni ili i na ama oo toni na abunda, amma Yesu Zamawawa tara le tā reve u zuwa le a nge'en o

ure wu ukwā wā yi. U yuwan tā ne tsarā u ɓolo aza a Isra'ila na Atakpaci a tyo e ekere a yi adama o o'wo ili i sa'avu i tā. O ure u nda u ɗa u tawayi na asuvu nden atsumā e le. ¹⁶ Waru ifoɓi ya Yesu Zamawawa i ɗa i kototoi tsurala tsa na tsā ri pe e memere ma ama o ndolo. Reve u kambato le o o'wo lipu tā, reve waru u kambato le ubatā wā Asulā. Yesu Zamawawa yuwan tā ili i ndolo suru nu ukwā wā yi a akpata.† ¹⁷ U tawā tā atsumā o uvadi u nda, reve u yuwan alajiya a Alabari a Sa'ani za na aa yuwusan adanshi adama a asuvu nden. U yuwaan ɗu tā Atakpaci alajiya, aza a na a danai alanga, waru a tyo ya'a tsu aza a Isra'ila, aza a na a ri zuzu. ¹⁸ Gogo suru ntsu, aza a Isra'ila na Atakpaci, a tawā ya Dada o ure u Ruhu va Akiza tā adama e ili i na Yesu Zamawawa yuwaan ntsu.

¹⁹ Adama o ndolo, aɗu Atakpaci,† i buwa omocin ko aza a na a ri aza e ida ya alanga shi. Amma, yo o'wo tā ama e ida i tā na ama a Asulā. Aɗu ama a ɗa a na a ri pe atsumā o u'wa wā Asulā. ²⁰ I tā gashi ikunku atsumā o u'wa aza a na a yuwusaan usaa a atali. Ajiya na Amasulā a tā gashi ikyun yu usaa u ndolo, waru Yesu Zamawawa ɗa ikyun yu ucira yu usaa'a. ²¹ Ayi ɗa za na banai usaa u ndolo maɓulā. U zuwa yi tā u kungwa reve waru u kamba aa'isa a akiza adama a Zagbain. ²² Adama a na i tu ubolu na Zamawawa u ɓolo ɗu tā na aza e Itoni, tsarā yo o'wo u'wa, ubatā u na Asulā aa danu nu ucira u Ruhu va Akiza.

3

Ulinga wā Bulu

¹ Amu, Bulu n ta atsuma o u'wa wa ali adama o ulinga u na Yesu Zamawawa zuwa numu n yuwan, adama n kamba du, adu Atakpaci. ² I reve ta de na Asula atsuma e isa'ani ya yi u ca mu ta ulinga u nda tsara n kamba du. ³ Asula a zuwa mu ta n reve ifofo i na u sokoi. N danaa du ta de wa'a adama e ili i nda. ⁴ Nni i deyinuna ili i na n danai, i te reve ili i na n revei adama e ifofo i nda adama a Zamawawa. ⁵ Asula o roco ama a na a yuwain de nden ifofo i nda shi. Amma gogo o roco yi ta e ekere a Ruhu va Akiza. O roco yi ta a tyo ubata wa ama a na u dangwai o o'wo ajiya na ama a Asula a yi. ⁶ Ifofo ya Asula i da nda: adu Atakpaci i ta ushi aba'un a na Asula a cayi suru, ununa aza a Isra'ila a ushi nle. Atakpaci na aza a Isra'ila o o'wo ta ama a ta. Adu Atakpaci fo i ta ushi ili i na Asula a yuwayin ama a yi nzuwulai adama a na adu fo i tu ubolu na Yesu Zamawawa. Ayi nda ayi da ili i na Alabari a Sa'ani a dammai.

⁷ Ayi nda ayi da Alabari a Sa'ani a na maa yuwusan alajiya. Adama a na Asula a ta ni isa'ani, u ca mu ta ulinga u na ma'a dana a dansaa ama Alabari a Sa'ani, waru u kamba mu ta n yuwan ulinga u nda nu ucira u na u ca numu. ⁸ Amu da za na la'ai ukalamu a tsugbain suru atsuma a ama a na a uwwusa wovon wa Asula, amma na ne suru, Asula a ca mu ta ulinga u nda n damma Atakpaci ili i sa'ani i na Zamawawa cayi. Ili i sa'ani i nda i la'a ta a na ama aa gura reve. ⁹ Waru Asula, za na yuwain ili suru, ca mu ta fo ulinga u na maa damma ama suru adama e ifofo i na u sokoi diga o ufaru. ¹⁰ U yuwan ta ili i nda, tsara u roco cira icu'un icu'un de zuva, u dana ta nu ugbozu

atsuma e ili i na u yuwain suru. Asula o roco ta ili i nda e ekere e ili i na u yuwayin aza e Itoni a yi. ¹¹ Asula a dangwa ta u yuwan ili i nda, nu ujimu kafu u yuwan uvadi, amma gogo u zuwa yi ta u fara e ekere e ili i na Yesu Zagbain Zamawawa tsu yuwain. ¹² Adama a na tsu cayi okolo ya'a yi waru o bolo tsu ta na ayi, tsu ta gura tawa ubata wa Asula faan waru babu wovon. ¹³ Adama e ili i nda, n te ipati i du, she asuvu a du a kuda wan adama a na moo sowuso atsumalima adama a du. Atsumalima a nda a ta tawaa du na tsugbain.

Zamawawa ciga tsu ta

¹⁴ Adama o ndolo, n ta kingyosu a makakan ma Dada tsu, reve n yuwusaan du avasa. ¹⁵ Ayi da Dada va amayun vu 'wa suru, va aza a zuva na aza a na a ri pa o uvadi. ¹⁶ Asula a ta gura zuwaa du aba'un a abunda lon. Adama o ndolo m pati ta tsara Ruhu va yi ca du ucira, adama okolo a du a gbama. ¹⁷ Waru m pati ta tsara Zamawawa danu atsuma o okolo a du adama a na i ca ta okolo ya'a yi. N ta a avasa i dana e icigi ya Asula na aza a du. Nni i yuwan ne, i ta dana tsu ufanga u na u sapai aralu atsuma e ida, waru gashi u'wa u na a suwai e ikyun yu usaa yu ucira. ¹⁸ O ure u nda, adu na ama a na a uwwusa wovon wa Asula suru, i te reve cine Zamawawa ciga ntsu. U ta ni icigi lon, upasu na cine vuma aa gura reve. ¹⁹ Ko na wo o'woi za lo na aa gura reve cine Zamawawa ciga ntsu shi, m pati ta Asula i reve ili i nda, adama yoo o'wo cine yi ntsayi i dana, cine Asula a ri.

²⁰ Asula a ta nu ucira u na waa yuwan ili i na i la'ai ili i na tsu pati niyi u yuwan, hali ni ili i

na tsu jiyain. Waru u yuwan le t̄a nu ucira u na waa yuwusan ulinga o okolo ā tsu. ²¹ Tsu cuwa niyi babu ukotu waru n̄a tsugbain ts̄a yi na o rocoi at̄sumā e ili i na waa yuwusan e ekere ā aa'isā ā azā e Itoni ne e ekere e Yesu Zamawawa! Ami.†

4

Lipu t̄a

¹ N t̄a at̄sumā o u'wa wa ali adama a na maa yuwusaan Zagbain aḡandā, agba n ta patishi d̄u i yuwan nden n na mu ntsayi n̄a desu na Asul̄a e de ndu i yuwan. ² At̄sumā e ili i na yaa yuwusan biti, i tara aciȳadū ili i ro wan, reve waru i kuru ben na ama. Adama a na i cigai ama, i yuwan ankuri, waru she i yuwan upan wan, na a yuwan unusu. ³ Ruhu va Akiza o'woto d̄u t̄a ili i t̄a, adama o ndolo i yuwan at̄yo a na yaa yuwan i danu obolo na asuvu nden, adama i danā ili i t̄a. ⁴ Suru ntsu lipu t̄a da tsu ri. Ruhu va Asul̄a t̄a da ri lo. Waru Asul̄a a ca tsu t̄a uzuwu wo okolo ā t̄a ana u dangwa ntsu tso o'wo ama ā yi. ⁵ Suru ntsu tsu t̄a n̄a Zagbain t̄a. Suru ntsu waru tsu usu t̄a uritosu u t̄a. Suru ntsu tsu ushi t̄a urumbusu u t̄a. ⁶ Tsu ta yuwusaan Asul̄a ā t̄a aḡandā, waru ayi da Dada tsu suru. Ayi da za tsugono tsi ili suru, waru u tu ubatā suru, waru u t̄a at̄sumā ā tsu suru.

⁷ Agba waru Zamawawa ca t̄a za suru at̄sumā ā tsu une'e lanḡa adama tsu yuwain ulinga wā yi. U yuwan t̄a ne adama ā abundā e isa'ani yā yi. ⁸ Cine Adanshi ā Asul̄a a dammai,
 “Ana u kumbai ā tyo zuva suru suru,
 u tara t̄a aza a na ā ri o u'wa wa ali obolo n̄a ayi,

reve u ca ama ne'e." ◇

⁹ (Gogo n ciga ɗu ta i yuwan majiyan adama e idanshi i nda, “u kara ta a tyo zuva.” ¹⁰ Nnu u kara a tyo zuva, ciga 'yuwan u ta dansa tsu, u shi ta de u tawa pa zala ubata o uɗaluwu o uvadi u nda. Vuma na tawai pa o uvadi u nda ayi da waru u kumbai zuva suru suru, adama u zuwa ili biti yo o'wo cine wu ntsayi.) ¹¹ Ayi da za na cayi aa'isa a aza e Itoni ne'e nda: u dangwa ta ozo o ro o o'wo ajiya, ozo o ro amasula, ozo o ro waru aza a alajiya a adanshi a Asula. Reve waru u zuwa ozo o ro a kalyuwusa aza e Itoni, reve ozo o ro waru aza o uritosu. ¹² U yuwan ta ne adama u fofo ama a Asula a na aa yuwaan yi aganda, adama aa'isa a aza e Itoni, za na ayi da lipu vu Zamawawa, u yuwan ucira. ¹³ Ne tsunda tsa da, suru ntsu tsoo o'wo obolo a ta o ure u na tsu cayi Asula okolo waru tsu revei Mawun ma yi, waru suru ntsu tsu ta kungwa ulobonu. U ta dansa, tsu to o'wo tsu Zamawawa, za na o o'woi cine wu ntsayi u dana.

¹⁴ A mantsa'a tsa buwa tsa muwun waru shi. Aa dashi vutala tsu nda na ndede tsa wantsun tsa na mini ma mala ma tsu vutalasa nda na ndede shi. Tsoo poloo ama a na a cigai a lumu tsu nu uritosu we epen atsuvu shi. ¹⁵ O unu u ndolo, tsu ta yuwain adanshi a amayun, reve tsu cigalai, adama tsu kungwai avu tso o'woi tsu Zamawawa suru suru, za na ayi da Aci a aa'isa a aza e Itoni. ¹⁶ Yesu Zamawawa bolo ta ama a yi, cine aruva o tsu bolo pasu lipu vuma suru. Nu upasu suru u yuwan ulinga wa yi, u tsu kamba ta akapi a pasu

◇ 4:8 Ica 68:18.

a kungwa, adama lipu'u suru u dānā gbaga waru ugbamu tapu ni icigi.

Wuma u sa'avu

¹⁷ Adama o ndolo, n ta dansaa ɗu, waru n ta ɓarasa ɗu ɗtuma a ala a Zagbain, i lyawa a yuwusan nden tsa ama a na e revei Asula shi. Ununa aa yuwusan majiyan ili ye pere i ɗa. ¹⁸ A ta ɗtuma e irumbu, waru e reve ili shi, adama a na a 'yuwain o polo atsuvu. Adama o ndolo aa tsura wuma u na Asula aa casu shi. ¹⁹ A mantsa ma na aa yuwusan ili i wono, a buwa a uwwusa wono shi. A ca ta de aciyele a mayan me ili i na lipu cigai, waru a ta yuwusan cu'un tsipere suru, waru a lyawa mayan me ili i nda shi.

²⁰ Adu gba, a mantsa ma na i revei Zamawawa, ne ɗa a damma ndu i yuwan nden n du shi. ²¹ N reve ta a na yu uwwai adama a yi, waru i ta ɗtuma a yi, adama o ndolo o roco du ta amayun a na a ri ɗtuma e Yesu. ²² O roco du ta i lyawa cu'un vu nden mu ufaru n na i shi aa yuwusan. A mantsa mo ndolo nden n du u shi ta a langasa adama a na i shi i cigai i yuwusan cu'un vi ili i wuya biti. ²³ Gogo gba i lyawa Asula a vadala wuma u du adama i fara majiyan ma sa'avu. ²⁴ Lyawa Asula a kambato du ama a sa'avu. U yuwan du ta yo o'wo tsa yi, adama o ndolo ni i ciga i 'yuwan yo o'wo aza a afula na akiza ɗtuma a amayun.

²⁵ Ni i ciga i 'yuwan i lyawa epen. Za suru u damma za va yi za vi Itoni amayun, adama a na ɗtsu tsu ta gashi pasu lipu ta koko'o. ²⁶ Na vu ri ɗtuma o upan, she vu yuwan unusu wan, waru vu lyawa urana u riyu wu avu ɗtuma o upan wan.

²⁷ She i lyawa Mekerkesu ma lyuwa aci a du

wan. ²⁸ Vuma na shi vivu she u dāshi yuwan wivu waru wan. U ta la'aa yi u yuwan ulinga lon adama u tsurā ili i na waa ca alambi.

²⁹ She i yuwan adanshi a vama wan, amma i yuwan adanshi a sa'ani a na aa gbamato ama. Vu damma ili i na yi ntsayi adama u kamba aza a na a uwwusa wu. ³⁰ Waru she i lungusa₂ Ruhu va Akiza okolo wan. Adama a na Ruhu va Akiza rotso t₂ urotsu† u na woo rocosu a₂du a₂ a yi a da. A₂sul₂a a ca du t₂ Ruhu'u adama u roco A₂sul₂a a ta lyawa du fa₂an o urana wu ukosu. ³¹ I lyawa adanshi a vama o okolo nu upan na asuvu usu₂duwu e ekere a ama o ro. She i yuwan n₂langi ko yi isulusa ama wan, ko i yuwan ili i ro i na i rotsoi n'yuwunlai wan, ko ke'en. ³² Ana yaa yuwan ne, u la'aa du t₂ i yuwunlai ili i na i lobonoi, reve i roco isa'ani a tyo ama a na a uwwusa a₂tsum₂alima. I yuwaan ama a₂tsum₂a a du gafura na a nusaan du, cine A₂sul₂a a yuwaan ndu gafura vu nusu du adama e Yesu Zamawawa.

5

Iyuwan nden a₂tsum₂a e ekan

¹ Adama o ndolo i yuwan wuma ts₂a A₂sul₂a, adama a na a₂du muwun ma yi n da n na u cigai lon. ² I ciga ama kuci, cine Zamawawa ciga ntsu, hali u kuw₂a adama a tsu. U ca t₂a A₂sul₂a wuma wa yi gashi kucci, reve gba wo o'wo tse ili i ma₂guru† lon e ekere a A₂sul₂a.

³ She a tsur₂a unusu u tsipere a₂tsum₂a a du wan, ko cu'un vi ili i wono i ro wan, ko uts₂an wan. Icu'un yu nusu ndolo a ntsaa a₂tsum₂a a ama a A₂sul₂a shi. ⁴ Waru wu ntsaa i yuwusan adanshi

o wono shi, waru she i yuwan adanshi a van-
vama wan, ko i yuwan tsuzo'ona adanshi e iwuya
wan. Amma i godyo Asulā adama e ili i na waa
yuwusaan đu. ⁵ I reve tā ili i nda amayun a đ
za na a yuwusan ili i nda waa uwa o tsugono
tsu Zamawawa nā tsā Asulā shi: nnā vuma aa
yuwusan unusu u tsipere, ko nā waa yuwusan ili i
wuya, ko ni ili i tsu rawa yi shi, adama a na za na ili
i tsu rawa shi suru u ta yuwusaan masulā agandā.
⁶ She i lyawa nanza pusaan đu ana wan, a dansaa
đu ili i na i ri mejege shi. Asulā aa lapā ca aza a na
a 'yuwain a yuwan tsutoni nā ayi atsumalimā shi,
aza a na a yuwusan ili yi idaba i nda. ⁷ Adama o
ndolo, she i bolo ekere na ama a na aa yuwusan ili
yi idaba i ndolo wan.

⁸ De nu ufaru, i đanā tā atsumā e irumbu, amma
gogo i tu uḅolu nā Zagbain, reve i uwa atsumā e
ekan. Adama o ndolo i yuwan nden tsa ama a na
a ri aza e ekan. ⁹ N damma tā ili i nda adama a na
ekan a tsu zuwa tā ama a yuwan ili i sa'ani, ni ili i
mejege, ni ili ya amayun. ¹⁰ Adama o ndolo, i rito
ili i na yoo yo'onoto Zagbain okolo waru i yuwan
le. ¹¹ She i bolo ekere a mayan me ili i na ama a na
a ri atsumā e irumbu aa yuwusan wan. Ili i ndolo
ili ye pere i đ. Amma, i zuwa ama e reve a na ili i
ndolo ili yu uwuyan u đ. ¹² Ili i wono i đ a yuwan
adanshi e ili i na ama a nda a yuwusan usokowu.
¹³ Amma ne ekan e ikana le, za suru te ene cine ili i
ndolo i ri, ¹⁴ adama a na ekan o tsu roco tā ili suru.
Ayi đ i zuwai a dammai,
“Ađu a na i ri a nlavu, i 'yon!
I 'yon diga o ukwā,
Zamawawa te ikana a aci a đu.”

15 Adama o ndolo i yuwan ugbozu cine yaa yuwusan nden n ɗu. She i yuwan nden n tsulo tsa ama wan, amma i yuwan nden nu ugbozu. 16 I yuwan ulinga na mantsa ma na i tsurai suru i yuwan isa'ani, adama a na ama a ta yuwusan iwuya a mantsa ma nda. 17 Amma she yo o'wo olo wan, amma i rito mayan me ili ma na Zagnain ciga ndu i yuwan. 18 She yoo o'wo ososowi wan, adama a na ayi ndolo u ta lungusa du. Amma i lyawa Ruhu va Akizaf shiton du nu ucira wa yi. 19 I cana icu'un yi ishipe ya Asula suru tsara i dashilai asuvu ugbamu. I cana ishipe adama i cuwa Zagnain no okolo a du suru. 20 I godyoo Asula Dada tsu kuci adama e ili suru adama a Zagnain tsu Yesu Zamawawa.

Amaci na ali

21 I yuwan ntoniloi, adama a na i ta casu Zamawawa tsugbain.

22 Adu amaci, i yuwan tsutoni na ali a du cine yaa yuwusaan Zagnain tsutoni, 23 adama a na vali da aci a ka, cine Zamawawa ri Aci a aa'isa a aza e Itoni, lipu va yi. Waru ayi da za na tsu wawa yi.

24 Adama o ndolo, ka suru yuwan tsutoni na vali va yi atsuma e ili suru, cine a aa'isa'a a tsu yuwan tsutoni na Zamawawa.

25 Adu ali, za suru atsuma a du u 'yuwan u ciga u ciga ka va yi, cine Zamawawa cigai aa'isa'a, avu u kuwa adama a yi 26 adama u kambato yi na akiza. Wu za'wa yi ta na mini waru na adanshi a yi. 27 U yuwan ta ili i nda adama wo o'woto aa'isa a yi ulobonu, avu waru u tawato yi a makakan ma yi tsa kasa'avu babu abasa a wufuru, waru babu

urakpatsu ko ili i ro a aci a yi. Amma, u dāna na akiza waru a tsura ili i na o goro a aci a yi wan. ²⁸ Ne da waru fo, vali ciga ka va yi, cine u cigai lipu va yi. Vali na cigai ka va yi u ciga ta aciyayi. ²⁹ Za lo na 'yuwain lipu va yi shi, amma u tsu lyuwato yi ta, reve waru u fofo yi. Waru ili i na Zamawawa a yuwasaan aa'isa a aza e Itoni a da ndolo, ³⁰ adama a na atsu pasu lipu va yi da. ³¹ Cine Adanshi a Asula a dammai, "Vali lyawa dada na mma va yi, reve u suraa ka va yi avu ele ra o o'wo ili i ta." ◇ ³² Amayun o ro a ta pe usokowu atsuma o uritosu u nda. N ta yuwusan adanshi a Zamawawa na aa'isa'a. ³³ Amma ayi nda fo amayun a da a tyo ya'a du: za suru ciga ka va yi cine u cigai aciyayi, waru ka suru u 'yuwan u ciga u ca vali va yi tsugbain.

6

Muwun na mbara

¹ Adu muwun, i yuwan tsutoni na mbara n du adama a na adu aza a Zagbain da, adama a na ili i na yi ntsayi i da. ² Za vu ufaru atsuma a Wila Kupa na koso'i na nzuwulai ayi da: "Vu yuwan tsutoni na dada na mma va wu." ³ Waru apa nzuwulai'i: "Na vu yuwan tsutoni na dada na mma va wu, ili i ta wala wu mejege, waru vu ta jima o uvadi."

⁴ Mbara, she i zuwa muwun n du n yuwan upan wan. Amma, i kalyuwa le ulobonu, i ca le asala waru i rito le cine Zagbain cigai.

Agbashi na azagbain

⁵ Adu na i ri agbashi, i yuwan tsutoni na azagbain a du pa o uvadi. Yu uwwa wovon u le,

◇ 5:31 Ufr. 2:24.

waru i ca le tsugbain, waru i yuwaan le aganda no okolo a ta cine yaa yuwaan Zamawawa. ⁶ I yuwan ulinga na amayun a mantsa suru, ko yaa yuwusan majiyan ma na azagbain a du a ri lo zuzu na adu shi. Amma ili i na i la'ai ayi da i yuwan linga du no okolo a ta, cine Asula a ciga ndu i linga, adama a na adu agbashi a Zamawawa a da. ⁷ I yuwan linga du na mazanga, gashi Zagbain da yaa yuwusaan, waru adama a ama a da goon shi. ⁸ I cuwan Zagbain ta ca iliyinkapa a aci o ulinga u na za suru yuwain, ko na ayi a aagbashi a da ko na aagbashi a da shi.

⁹ Adu na i ri azagbain, i guza fo agbashi a du ulobonu. She i damma i ta zuwa le o sowo atsumalima wan. I cuwan, azagbain na agbashi, suru ndu i ta na Zagbain ta de zuwa, waru u ta kalyuwusa za suru unata.

Itana yu uvon ya qza e Itoni

¹⁰ Ikaka yu ukosu i va a tyo ya'a du ayi da: I dana nu ucira wu Zagbain u na u ri mgbain kuci, adama a na o bolo du ta na ayi. ¹¹ Yo oto itana yu uvon i na Asula a ca ndu adama a na Mekerencesu ma cigai ma pusan du ana, ne da yaa gura isawan nu ucira avu i kuda riya. ¹² Na ama tsa tsu tsa da tsa yuwusan nlangi shi, amma tsu ta nlangi na nan ruhu a wuya obolo na cira icu'un icu'un i na i ri o tsugono atsuma o uvadi u tsu u nda na ri ni irumbu, waru tsu ta yuwusan nlangi na cira vi iwuya na ri zuwa. ¹³ Adama a nda, i tara itana yu uvon i na Asula a ca ndu suru. Ne da o urana wi iwuya yaa vadala shi. I ta yuwan nlangi hali a tyo o ukosu, waru i ta buwa mishin nu ucira.

14 I fo_o aciya_{du}! I damma amayun a mantsa suru. Amayun a ta_{gashi} gbakala na vuma tsu nla_e e ikyun tsara_u u dana_u ufo_{bu} u na waa yuwan ili. I yuwan ili i na i ri mejege, adama a na nden n sa'ani u ta_{gashi} utugu wu rumu. 15 I lyuwa elime nu u'ususuwu wa Alabari a Sa'ani a na a casu asuvu nden. Ne da wo o'wo gashi i ta_{na} atan a ana a du, waru i ta_{dana} ufo_{bu} ulobonu. 16 Ili i ro i da nda waru: I lyuwa elime nu ucasu wo okolo e ekere e Yesu Zamawawa. Ucasu wo okolo a du a ta_{dana} gashi aara_{ga} a na ee geshe iliya ya akina yu utan, aza a na Male me tewiyin a tyo ya'a du. 17 Lyawa iwawi ya Asula_{yo} o'wo du tsa melezu ma aara_{ga} na tsu geshe aci a du. Waru i dana_u ufo_{bu} u na yaa yuwan ulinga na Adanshi a Asula_u. U ta_{gashi} matsun me pe'eni ma na Ruhu va Akiza ca ndu. 18 Na yaa yuwan ili i ndolo, i yuwan avasa waru i pati Asula_a kamba du atsuma_e e ili suru a mantsa suru cine Ruhu va Akiza roco ndu. Waru ni i ri a avasa, i dana_u ufo_{bu}. I lyuwa elime na mayan ma avasa kuci adama a ama a Asula_u suru.

19 I yuwaan mu fo avasa, cine Asula_a a ca mu idanshi i sa'ani i na maa damma n na n fara mayan ma adanshi, tsara_n yuwan adanshi babu wovon, tsara_{waru} n damma ama ikaka i na Asula_o roco ntsu gogo atsuma_a a Alabari a Sa'ani. 20 Yesu Zamawawa dangwa mu ta_{mo} o'wo malingata ma yi, n yuwan alajiya a Alabari a Sa'ani a nda, ayi da i zuwai n ri ugutsuwu na akani gogo atsuma_o u'wa wa ali. I yuwan avasa na maa yuwan alajiya a Alabari a Sa'ani'i n yuwan yi babu wovon, cine wu ntsayi n yuwan.

Icasu yu ukosu

²¹⁻²² N ciga ɗu ta i reve cine n ri waru ni ili i na maa yuwusan. Ayi da i zuwai maɗa lyungusu Tikiku ya'a ɗu. Ayi za tsu da za na tsu cigai, waru u ta yuwusaan fo Zagbain aganda ulobonu. U ta damma ɗu ili i na yaa cinasa tsu, waru u ta dashi ɗu asuvu ugbamu.

²³ N ta yuwusan avasa Asula Dada obolo na Zagbain Yesu Zamawawa ca ɗu asuvu nden, ni icigi, nu ucawu wo okolo a tyo a za vi Itoni suru!

²⁴ Lyawa Asula o roco isa'ani ya yi a tyo ubata wa aza a na a cigai Zagbain Yesu Zamawawa ni icigi i na yoo koto shi.

**Nzuwulai n Sa'avu na Tsishingini na adiva a
na a dangulai a Nzuwulai mu Ufaru
New Testament in Tsishingini (NI:tsw:Tsishingini)**

copyright © 2011 Wycliffe Bible Translators, Inc.

Language: Tsishingini

Translation by: Wycliffe Bible Translators, Inc.

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Tsishingini

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2019-08-09

PDF generated using Haiola and XeLaTeX on 11 Nov 2022 from source files
dated 29 Jan 2022

bb185c63-dc44-572c-ae93-66252c4dfa1e